

Tužilaštvo KS-a će tražiti pritvor za unuke tvorca poznate sarajevske čevabdžinice Mrkva

UTAJA POREZA PREKO ČEVAPA?

- Tužilaštvo strahuje da bi Adnan Mrkva i Amel Čapin mogli pobjeći u SAD, s obzirom na to da imaju američko državljanstvo
- Izbjegli platiti državi 5.532.287,99 KM?

Adnan Mrkva (1971), Amel Čapin (1972), Ermin Špilja (1985), Adis Biberović (1984) i Arif Maličić (1969), koji su u ponedjeljak u jutarnjim satima uhapšeni u akciji SIPA kodnog naziva Rebus, jučer su predati tužitelju Kantonalnog tužilaštva Sarajevo na dalje postupanje. Kako saznajemo, za Mrkvu i Čapina će biti zatražene mjere pritvora, te će prijedlog biti upućen danas Kantonalnom sudu, dok će za Špilju, Biberovića i Maličića biti predložene mjere zabrane, odnosno zabrana napuštanja mjesta boravišta.

Nesuglasice među nasljednicima

U pojašnjenju prijedloga, tužitelj navodi da se mjere pritvora traže zbog opasnost od bjekstva u SAD, s obzirom na to da i Mrkva i Čapin imaju američko državljanstvo, te zbog opasnosti da će dovršiti krivična djela za koja se terete i utjecati na svjedoke, ali i da bi njihovo puštanje moglo dovesti do narušavanja javnog reda i mira.

Adnan Mrkva i Amel Čapin vlasnici su privrednih društava Mrkva d.o.o. Sarajevo i Mrkva Group d.o.o. Sarajevo koja se bave preradom mesa. Kako je poznato, čevabdžinica Mrkva kulturni je ugostiteljski objekat sa tradicijom od 1963.

godine, kada je Ejub Mrkva odlučio otvoriti čevabdžinicu u samom srcu Sarajeva.

Nakon hapšenja navedenih osoba, redakciji Oslobodjenja obratio se Denis Mrkva, Ejubov unuk koji danas živi i radi u SAD-u. Njegovi rođaci Adnan Mrkva i Amel Čapin rukovođenje Mrkvom preuzeli su 2013. godine.

- Ejubova kćerka Fadila Hasanbegović je uspješno vodila Mrkvu sve do smrti 2013. Tada se Mrkva iz onog perioda gasi usljed nesuglasica između pravnih nasljednika Fadile sa jedne strane, i Amire Mrkve, također Ejubove kćerke, sa druge. Nesuglasice su bile u vezi sa poslovanjem u skladu sa tradicijom i u skladu sa zakonima države koja nam je od 1963.

godine omogućila da poslujemo pošteno, prvo Jugoslavija, a potom BiH, ispričao je Denis, te naglasio da privredno društvo Mrkva Group, čiji su vlasnici Adnan i Amel, od početka svog osnivanja nema nikakve poslovne veze sa privrednim društvom Mrkva d.o.o. On je na kraju napomenuo da mu je veoma teško što se ovo dešava, te što je ugled



Mrkve, koja važi za simbol Sarajeva kada je u pitanju ugostiteljstvo, narušen.

14 lokacija

Policijски službenici su tokom akcije pretresli 14 lokacija u Sarajevu. Poznato je da je Mrkva, po-

red čevabdžinice na Baščaršiji, otvorio nekoliko objekata na Grbavici, Dobrinji, Dolac-Malti. S obzirom na to da je pretres izvršen po naredbi Kantonalnog tužilaštva, kao razlog je navedena osnovana sumnja da su navedene osobe izbjegle plaćanje poreza od 5.532.287,99 KM za period od 1. 1. 2011. do 12. 10. 2015, te stekle protivpravnu imovinsku korist i tako oštetile budžet FBiH.

Kako je već objavljeno, osobe uhapšene u akciji se osnovano sumnjiče da su počinile krivično djelo organizovani kriminal u vezi sa krivičnim djelom porezna utaja, krivotvorenje ili uništenje poslovnih ili trgovačkih knjiga, podnošenje lažne poreske prijave, posebni slučajevi krivotvorenja isprava, a sve u vezi sa krivičnim djelom pranje novca.

E. GODINJAK